

原獻文錄卷三



原獻文錄卷之三

知縣焦雲龍鑒定

邑人賀瑞麟編輯

劉紹攷

見邑志

關中人文傳

關中古帝都太史公稱其有先王之遺風哲士挺生代不乏人  
矣近今之士或踐履躬行或殫精著述詩書之澤聖人之徒也  
見聞所及李顒諸人可紀已李顒者盩厔人也字中孚父可從  
崇正十四年從總督汪公喬年出關征闖賊戰死襄城顒年甚  
少稍長求父死所母不許奉遺齒晨夕嚴事母沒合葬既除服  
乃齋衰哭於城隍廟然後徒跣行未至襄襄城隍以其事見夢  
襄令令覺而異陰使人物色厚遇之指示戰場白骨千萬纍若  
邱山不可辨顒痛絕致祭招魂歸襄人舉祀起冢並封暴骨崑

山顧甯人作襄城紀異詩傳寫徧海內邑宰駱公鍾麟執禮如  
弟子制府百執事數請之皆稱病不謝再舉博學鴻詞不應早  
歲困躓或教令謀食彭太夫人誠以勿規小利乃益勉學織屨  
爲生春夏藜藿果腹秋冬木實蕪菁常有菜色而母子嬉如也  
學使者許公孫荃爲易田三十二畝僅免饑寒康熙四十二年  
聖祖西巡入潼關 手詔宣見顒年已七十餘矣以老不至  
復 詔就其家取所著二曲集四書反身錄 命近臣校  
閱藏之中秘年七十九卒顒篤實行其學大致主象山生平不  
妄交四方問遺者相屬於道皆固卻之惟與李柏因篤善人稱  
三李恨不識其面然因篤受職歸謁顒顒曰是借徑南山者也  
閉不納三請乃見士論高之李柏字雪木郿人少貧傭於酒家  
鄉先達從酤異其貌爲誦詩十章卽上口授書過目不忘勸之

學乃入太白山十年成大儒名公卿多招之出柏度不獲行已志卒辭歸朝夕謳吟拾山中櫟葉書之門人都其集曰櫟葉集李因篤字天生一字子德富平人爲明諸生棄游塞上靖逆侯張又南督兵松江尊貴坐見客獨接因篤必重禮之會 詔

舉博學鴻詞又南及閣學李公天馥交章薦 召試體仁閣下以布衣授檢討未幾以母老告歸爲人貌樸性質直初入都南人易之一日讌集語杜詩因篤應口誦或曰偶熟此耳詰其他卽舉全部復言其精奧皆前人所未發朱竹垞集述之甚詳在館職時王阮亭汪茗文主詩社暨南北幟士多屈服因篤與抗禮蕭山毛奇齡亦天馥所薦稱天馥老師侍立比弟子因篤獨齒序呼之曰兄奇齡善古韻與因篤語輒牴牾眾莫能定唯顧甯人是因篤而非奇齡甯人著音學五書因篤多與力焉因篤

學富而詩最工彭都憲啟豐序李石臺集稱爲鴻博大科中第一人也嘗作長安秋興八首孫豹人謂少陵無以過之有受祺堂詩文集豹人名枝蔚三原人世爲大賈業鹽筴甲申之亂枝蔚年二十四散家財求壯士起義不果就隻身走江都折節讀書遂以詩名世年六十與李因篤並舉博學鴻詞時有奔競執政之門者京師語曰萬方玉帛朝東海一點丹誠向北辰枝蔚恥之求罷不允促入試不終幅而出 天子詔示諸布衣處士有文學素著老不任職事者授京銜以寵其行及格者八人枝蔚與焉部擬正字 上薄之特與中書舍人吏部集驗於庭獨臥不往旋被敦促乃徐入逡巡主爵者見其鬚眉皓齒引之使前曰君老矣枝蔚正色曰未也我年四十時卽若此且我前以老求免試公必以爲壯今我不欲以老得官公又以爲老

何也部臣愕謝卒以老官之枝蔚貌魁梧性伉直初以明季流離好講兵事家在三原毀於賊比從京師歸復走江都著慨堂集王阮亭云古詩能發源十九首漢魏樂府兼有陶儲之體以少陵爲尾閭者今惟焦穫先生一人耳從之游者皆有聲海內而王又旦最著又旦邵陽人字幼華父早世貧不能就傅從仲父斗南學仲僅識字與又旦說經必先就鄰舍生受解義記其語歸而誦之又旦復述務肖其語義是而語稍變扑之日課數千言否亦扑之其學爲最苦然因以富弱冠舉於鄉令潛江纔三十耳豹人時居江都迎之受詩比入爲給諫已能頡頏豹人朱竹垞稱其兼綜唐宋人之長獨不取黃山谷年五十一卒於官有黃湄詩集當是時關西之士恥效章句皆以通經學古爲尙卓然名家者三原則有溫日知韓聖秋聖秋爲吏部郎日知

有弟自知與亨皆處士涇陽則有李念慈張恂念慈字岷瞻嘗  
爲令薦博學鴻詞不第隱居峪口山詩曰峪口山房集恂字穉  
恭一字壺山以進士爲江南理刑善畫落筆片紙值千錢皆與  
三李豹人黃湄輩還往酬答而名稍後唯華陰王宏撰朝邑李  
楷與三李豹人黃湄輩齊名楷字叔則著河濱全集令寶應以  
直廢康熙二年撫軍賈公漢復請董陝志宏撰尙爲諸生從楷  
編摩楷善古賦文樸茂錢牧齋亟稱之得名在三李前三李推  
楷先進宏撰與三李同時於楷爲後輩而楷喜從宏撰宏撰讀  
書華山好易精圖象學者翕然宗之得一言以爲重凡碑版銘  
誌非三李則宏撰而宏撰工書法故尤多於三李然三李宏撰  
常在京兆扶風閭馮翊以東推康乃心乃心字孟謀王阮亭奉  
使過秦見其題秦莊襄王墓詩爲延譽登康熙己卯賢書初

乃心力學好古人莫知之雖與王又且同里而又且宦外及又  
旦歸乃心名已成自三李至乃心皆同時稍有先後其閒宏撰  
乃心最少乃心尤少於宏撰宏撰晚年三李輩已沒猶有乃心  
乃心老宏撰亦故士乃零落矣獨武功康呂賜鄠縣王心敬二  
人耳呂賜字一峰以明經居龜山竟歲不入市心敬字豐川幼  
學中孚爲邑弟子歲試提學遇之不以禮發憤曰昔陶令不受  
五斗米我豈戀一青衿乎遂脫巾幘出除其籍二人爲理學俗  
未之識也獨涇陽王承烈首禮之承烈字遜功在翰林十餘年  
無知者雍正元年相國朱公軾密啟拜諫議參楚藩晉江西布  
政使所至以廉直著清操過人不負所學卒於司寇至無以殮  
有復菴詩說若干卷康熙年間公憂居會朱公爲督學訪士於  
公乃知有康王數造廬問業人始稱之然呂賜居遠謝交游故

聲華黯澹心敬居近而鄂令金某罷職嘗依心敬後復官時稱道是以呂賜老死而心敬爲當事所知總制額公忒倫年羹堯先後上章薦兩徵不起當羹堯爲大將軍聲勢烜赫士多想望爭欲出其門羹堯招心敬心敬不往羹堯敗士註誤或禁錮終身心敬不與也雍正八年心敬子爲令陞 見例陳摺

上見而嘉之曰名儒子故不凡令奏摺者以爲式乾隆元年蒲城進士某 廷試大學士鄂公爾泰問豐川安否進士素昧豐川不能應鄂公笑曰若不識關中儒者何太俗耶秦中新除大吏來與夫皇華經過鄂公必寄聲候豐川動定其見重當世如此豐川時涇陽有劉涵三原有袁仁林仁林字振千飭躬嗜古洞黃老術註參同契高出諸家以明經終涵字若干官翰林擅名詞苑卒揚州太守然不若蒲城屈晦翁復不仕不再娶踪跡

徧天下詩名震一世司寇張公鵬翮冢卿楊公超曾先後薦之  
不起訪之不見與豐川相暉映也豐川後寂無人焉有則指目  
牽引羣怪聚罵憶少小聞長老言三李時人守公論士有定評  
及豐川崛起非有遺行也遠方鄰境交口頌而鄠之爭名者造  
爲讒謗復何倖三李之盛哉信乎名譽之光道德之行難已豐  
川有江漢書院講義語錄諸書

九畹子曰會稽沈子天成勤探討留心當世務嘗言我朝儒  
者首中孚甯人而中孚刊落聲華固當在甯人先可謂知人能  
論士矣今之世莫不知豐川鮮能識一峰其亦折衷於沈子之  
論哉

### 後傳

昔后稷封釁不畱竄戎公劉處豳太王遷岐文王作豐武王都

鎬皆在關中故其民有先王遺風朱子曰雍州土厚水深其民

重厚質直以善導之易以興起而篤於仁義以猛驅之其強毅

果敢之資亦足以強兵力農而成富強之業地氣然也是以聖

賢挺生屢世不乏近日學者多言詩文要其宗主舉不外是詩

始蘇李文推史漢蘇家杜陵

即今咸甯縣

李家成紀

即今隴西

皆秦產也

班在扶風人無異說馬遷生長龍門河津之人援以自重世多

惑焉地理今釋曰龍門山在陝西西安府韓城縣東北五十里

大河之西東與壺口相望太史公自序亦云先世入少梁少梁

古梁國後名夏陽即今韓城

經史注及路史通典諸書皆同

又曰錯孫靳賜死

杜郵葬於華池又曰靳孫昌昌生無澤無澤生喜皆葬高門夫

杜郵在咸陽西

見索隱

華池者晉灼謂在鄠縣索隱謂在夏陽西

北蘇林以高門爲長安北門索隱謂在夏陽西北去華池三里

今韓城有里曰高門又有太史公墓左蘿石爲記語不同處而同在秦遷之爲秦人信

矣九峯蔡氏作書傳既云龍門地志在馮翊夏陽又何以稱今

河中府龍門縣皇輿表河中府今蒲州龍門縣今河津縣蓋山勢綿亙廣闊禹鑿爲

二半晉半秦按宋李復謂禹鑿龍門起於唐張仁愿所築東受降城之東自北而南至此山盡在秦者

以韓侯重卽詩韓侯封國故舍山繫國在晉者因得託名而遷之世居

不外高門則實秦也秦之人文於斯盛矣余旣網羅近今統爲

一傳復就所聞並著於篇王建常字仲復朝邑人早棄帖括居

河渭之間著述自娛嘗作律呂圖說二卷原本朱蔡參之李文

利王子魚邢雲路諸書而折衷以自得之義崑山顧甯人一見

折服曰吳中未有也富平曹玉珂字陸海耀州宋子真皆不及

詳其事子真並逸其名然子真嘗與王山史同修秦志陸海見

王阮亭居易錄稱爲一時人豪而知者蓋鮮涇陽雷伯顓明季

避居淮揚與孫豹人善余少見其文集今失之詢於鄉人亦無  
舉其名則修身砥行而湮沒不彰者獨三人哉張郊字東野三  
原人妻何氏早喪鰥居終身常讀文選好爲綺麗之音以孝廉  
授邠州博士之任載書數車曰吾老是中矣

論曰東南物之發生西北物之成熟

見史記

發生華葉成熟者實

秀而不實實未有不華者華實並茂秦實有焉以余所交潼關  
楊鸞秦安胡鉞方將勤探討追前修楊成進士胡以鄉貢名之  
顯晦未知視仲復諸人何如也

### 書後

秦古帝都代不乏人我朝造士尤多閒出余旣網羅舊聞兩  
爲立傳甲子孟冬偶過新繁於石幢書齋見鄧孝威詩觀初集  
採輯秦風余所不逮者十六人涇陽郭士璟字飲霞一字梅書

任璣字嘯菴張載緒初名湛儒字水若郭礎字石公一字橫山  
有瓊花草堂集王祚昌字天葉有漁古堂近詩韓城李國璉字  
連城李化麟字溪河景麟字星河三原房廷禎字興公一字慎  
菴王相業字子亮一字雪蕉有泗濱草狄道張謙字牧公有得  
樹齋詩集臨潼呂振之字大律長安王巖字平格一字築夫甯  
夏曾晚字楚田一字庭聞蘭州凌元勳字蔚侯有存園詩集固  
皆大雅卓爾可傳畧存梗概庶幾他日考焉

### 顧亭林先生傳

先生姓顧氏初名絳字甯人後名炎武別字亭林江南崑山人  
生於明季聰穎過人博通強識好爲蒐討辯論之學上自經史  
旁及子集稗野列代名人著述微文碎義近自當世務鹽茶水  
利屯田官方兵農之屬無不究其得失常騎驢走天下荒山頽

址碑斷碣殘僵仆沈翳於奧草寒煙苔痕斑駁不可讀必披草剔蘚摩娑注視錄其要以歸或曰顧於江南爲望族曾大父自方伯洊卿貳大父贊善先生早入復社與同邑歸莊齊名皆耿介絕俗鄉人有歸奇顧怪之目兵後盡鬻其產寄居章邱別治田舍久爲土人攘奪又遷山西之曲沃一車兩馬載十四經增

戴二十一史暨明累朝實錄攜子游天下日五六十里或三四里就館啟篋朗誦課子聲相應和流連數日然後去或不踰日卽去有勝地必訪名士必交好古君子卿大夫致位巷處者無不慕先生所至爭逢迎先生欣然與之游唯不喜榮利當事要人拒不與通嘗游關中善盤屋李中孚富平李子德華陰王宏撰寓華下最久故關中學者多能言先生事康熙十八年開博學鴻詞科士有令聞者皆應舉中朝諸公莫不欲薦先生先生

固絕之崑山徐氏爲先生甥徐氏兄弟掇巍科致顯仕聲稱烜赫而大科之舉尤主持之招先生先生不應獨逍遙車塵馬跡閒一日過濟南太守目爲狂人下獄李子德自秦馳往救之會遠來者益眾太守悔蹕請出先生卒老於沃猶子洪善爲中翰先生性質直負氣節嫉惡太嚴譏訶古今人必刺切少爲詞章甫脫稿膾炙人口中年講經濟作日知錄三十二卷首明經義次正諸史次禮樂刑政溯流窮源揆今準古實可施行末析方名覆同異必歸至是先生歿其徒潘耒刻於閩中今遍天下家有其書矣尤精古韻故相國李公光地在館職時從質疑先生曰古者同文聲與形應凡字旁從某音必從某後世不悟音譌反謂古音爲叶皆非也唐韻承江左末流部居悉舛分合之間紛不可治今當以詩易周秦之文爲正質驗字旁分者并之合

者離之使古書無二音始復其舊後與李子德共爲音學五書  
李公見之歎曰平上去三聲雖有差互猶得類從入聲則雜亂  
尤甚如人經荒流者不第鄉貫不可復追姓氏族系皆不自別  
矣有顧氏之書然後三代之文可讀雅頌之音各得其所語聲  
形者自漢晉以來未之有也初先生爲韻書旣成厚自寶秘曰  
五十年後乃有知我者耳當時見其大異舊說知者尙少未十  
年而言韻者無不宗先生矣

九畹子曰衛先生爾錫言先生有地理書李先生子德言有利  
病書用心尤多李公光地求之未得明詩綜謂有肇域志卷帙  
最富歿後散佚意卽所稱地理利病書與先生游至一邑必讀  
其志乘游幾徧天下志乘之讀亦幾徧天下又摩臨於碑版諮  
訪於故老必有纖細不遺措置得宜者而惜不可見也嗚呼今